

Na osnovu člana 23. i poglavlja Izmjene i dopune Statuta Planinarskog Saveza Federacije Bosne i Hercegovine, Skupština Planinarskog Saveza Federacije Bosne i Hercegovine na redovnoj sjednici Skupštine, održanoj dana 14. aprila 2012. godine u Sarajevu utvrđuje prečišćeni tekst Statuta Planinarskog Saveza Federacije Bosne i Hercegovine. Prečišćeni tekst Statuta Planinarskog Saveza Federacije Bosne i Hercegovine sadrži Statut Planinarskog Saveza Federacije Bosne i Hercegovine donesen na Skupštini Planinarskog Saveza Federacije Bosne i Hercegovine – Broj: : 01-166-11/08, održanoj dana 06. 12. 2008. godine u Sarajevu, te njegove izmjene i dopune koje su donesene na redovnoj sjednici Skupštine održanoj 29. marta 2014. godine u Sarajevu., te njegove izmjene na redovnoj sjednici Skupštine održanoj 22. Maja 2016. Godine u Visokom

S T A T U T

PLANINARSKOG SAVEZA FEDERACIJE BOSNE I HERCEGOVINE / prečišćeni tekst /

I - OSNOVNE ODREDBE

Član 1

Planinarski savez Federacije Bosne i Hercegovine je savez, koji je osnovan Zajedničkim sporazumom članova Saveza, usvojenim na Osnivačkoj skupštini održanoj dana 06.12.2008.godine, u skladu sa Zakonom o udruženjima i fondacijama Federacije Bosne i Hercegovine. Planinarski savez Federacije Bosne i Hercegovine (u daljem tekstu Savez) je dobrovoljna, interesna, nevladina, vanstranačka organizacija, koja po osnovi dobrovoljnosti okuplja udruženja – planinarska društva, planinarske specijalističke organizacije – stanice Gorske službe spašavanja i klubove na teritoriji Federacije Bosne i Hercegovine koji prihvataju ovaj Statut, te programe Saveza. Savez ne dopušta rasnu, nacionalnu, vjersku, socijalnu, dobnu, spolnu i političku diskriminaciju, te kršenja slobode i prava čovjeka i građanina.

Savez će djelovati na cijelom području Federacije Bosne i Hercegovine.

Savez je povijesni/historijski/istorijski sljedbenik planinarske baštine u Bosni i Hercegovini.

Član 2

Ovim statutom, u skladu sa Zakonom uređuje se:

- puni i skraćeni naziv Saveza i sjedište Saveza
- ciljevi Saveza
- postupak za primanje i isključivanje članova Saveza
- organi Saveza
- pravila za ostvarivanje, korištenje i raspolaganje sredstvima Saveza i nadzor nad korištenjem tih sredstava
- javnost rada
- postupak za izmjenu i dopunu Statuta i donošenje drugih opštih akata
- oblik i sadržaj pečata
- zastupanje Saveza
- uslovi za pripajanje, razdvajanje, transformaciju ili prestanak rada Saveza
- postupak za raspolaganje imovinom i drugim sredstvima u slučaju raspuštanja ili prestanka rada Saveza
- druga pitanja od značaja za organizaciju i djelovanje Saveza.

II – NAZIV I SJEDIŠTE SAVEZA

Član 3.

Puni naziv Saveza je:

Planinarski savez Federacije Bosne i Hercegovine

Planinarski savez Federacije Bosne i Hercegovine

Планинарски савез Федерације Босне и Херцеговине

Скраћени назив Saveza:

PS FBiH
PS FBiH
ПС ФБиХ

Naziv na engleskom jeziku je (napisati uz ovjeru sudskog tumača)

**MOUNTAINEERING ASSOCIATION OF FEDERATION OF BOSNIA – HERZEGOVINA –
Planinarski savez Federacije Bosne i Hercegovine**

Naziv Saveza istovjetan je na sva tri službena jezika koja su u upotrebi u Bosni Hercegovini.

Puni naziv Saveza službeno se koristi na latinici i ćirilici.

Član 4.

Sjedište Saveza je u Sarajevu.

Adresa Saveza je: Ul. Mula Mustafe Bašeskije 63.

Član 5.

Znak Saveza je stilizirani oblik potkovice u pet boja, plava , bijela, zelena, crvena i zlatna, čija je osnovica vezana vrpcom.

Po vanjskom rubu potkovice ispisan je naziv “ Planinarski savez Federacije Bosne i Hercegovine “, a na vrpci je upisana godina “1892”. Vanjski rub potkovice i vrpca su crvene boje, a slova i brojevi su ispisani bojom zlata.

Unutar potkovice nalaze se zeleno-bijele konture planine, što simbolizira šumu i snijeg, a iznad toga plavom bojom nebo, sa centralno postavljenim cvijetom runolista bijele boje.

III – CILJEVI SAVEZA

Član 6.

Savez je osnovan radi ostvarivanja zajedničkih interesa članova Saveza, bez namjere sticanja profita

Osnovni ciljevi Saveza su:

- da stvara uslove za razvoj i unapređenje organiziranog rada u svim granama planinarstva (visokogorsko planinarenje, ekspedicionizam, alpinizam, spasavanje u planinama, sportsko penjanje, turno skijanje, planinski biciklizam i drugi oblici ekstremnih planinarskih aktivnosti, planinarska orijentacija, vodička služba, speleologija, planinarska rekreacija i druge grane u planinarstvu), te turističkim i drugim aktivnostima koje su povezane sa planinarstvom, razvojem materijalne osnove i sigurnosti u planini
- da organizira pripreme i stručnu obuku planinara, a posebno omladine za trajno bavljenje planinarskim aktivnostima

- razvija dobru saradnju sa lokalnim stanovništvom, drugim nevladinim organizacijama i privrednim subjektima u cilju bolje valorizacije i ekološkog očuvanja planina
- da zauzima stavove , javno se oglašava i sarađuje sa drugim organizacijama i državnim organima radi ekološkog očuvanja i skladnog valorizovanja i iskorištavanja planina kao prirodnog i planinskog turističkog resursa

IV – DJELATNOST SAVEZA

Član 7

Osnovna djelatnost Saveza je:

- da odgaja članstvo u smislu čuvanja , zaštite i unapređivanja prirode na planinskom području općeg društvenog bogatstva koje ima posebno i šire ekološko značenje , kako za same planinare , tako i za podnožja i dalje vodene tokove
- da inicira gradnju planinarskih objekata i smještajnih kapaciteta na planinarski pogodnim lokalitetima, te planinarskih putnih komunikacija u planinama kao i njihovo očuvanje i održavanje
- da razvija materijalnu osnovu planinarstva i privrednih djelatnosti osnivanjem ili učešćem u osnivanju privrednih subjekata koji doprinose unapređenju planinskog turizma i kulture planinarenja u BiH
- Ostvaruje saradnje sa drugim srodnim savezima u zemlji i inostranstvu te stvara uslove za članove Saveza u evropskim i svjetskim asocijacijama koje imaju iste ili slične ciljeve kao Savez.
- Ostvaruje marketinšku djelatnost
- Obezbjeduje koordinaciju između planinarskih organizacija u realizaciji programskih ciljeva
- Ostvaruje druge zajedničke interese članova Saveza, u skladu sa osnivačkim aktom i Statutom Saveza

Član 8.

Utvrđene ciljeve Savez ostvaruje na način određen zakonom, ovim Statutom i drugim opštim aktima Saveza

U ostvarivanju svojih ciljeva Savez se neće uključivati u predizborne kampanje niti će prikupljati sredstva za kandidate ili za finansiranje političkih stranaka.

V – ČLANOVI SAVEZA

Član 9.

Svojstvo člana Saveza može steći svako pravno lice registrovano na teritoriji Federacije Bosne i Hercegovine, koje u svojim programskim zadacima ima opredjeljenje za razvoj planinarstva i zaštitu čovjekove okoline, privredni subjekti koji u svom djelovanju nalaze materijalni i društveni interes da učestvuju u radu Saveza, te asocijacije svih oblika okupljanja, na svim nivoima od interesa za djelatnosti i razvoj planinarstva.

U cilju zajedničkog djelovanja članovi Saveza se mogu povezivati regionalno ili na drugi teritorijalni način u skladu sa svojim opštim aktima i prepoznatim interesima.

Osnivači stiču svojstvo člana Saveza danom registracije Saveza.

Član 10.

Članstvo u Savezu je dobrovoljno.

Član 11.

Pravna lica iz člana 8. stav 1. ovog Statuta stiču svojstvo člana Saveza na osnovu zahtjeva za prijem u članstvo i izjave o prihvatanju ciljeva i Statuta Saveza.

Uz zahtjev za prijem u članstvo prilaže se izvod iz registra kod nadležnog organa kod koga je pravno lice registrovano, odluku o podnošenju zahtjeva za prijem u članstvo donesenu od strane nadležnog organa pravnog lica koje podnosi zahtjev i statut udruženja usaglašen sa ovim Statutom.

Član 12.

Odluku o prijemu novog člana Saveza donosi Upravni odbor Saveza

Protiv odluke Upravnog odbora, u roku od 30 dana, može se izjaviti prigovor Skupštini Saveza, čija je odluka konačna.

Član 13.

Članstvo u Savezu prestaje:

- Istupanjem člana
- Isključenjem člana
- Prestankom pravnog subjektiviteta člana

Član 14.

Svaki član Saveza može istupiti iz Saveza, na osnovu pismene izjave o istupanju koju dostavlja Upravnom odboru Saveza.

Kao dan prestanka članstva smatrat će se datum pismene izjave o istupanju.

Član 15.

Član Saveza koji grubo krši Statut Saveza, ne izvršava svoje obaveze prema Savezu, ili svojim postupcima nanosi štetu Savezu, ili narušava ugled Saveza, može biti isključen iz Saveza.

Prije donošenja odluke o isključenju, član Saveza mora biti obaviješten o prijedlogu za isključenje, kao i razlozima zbog kojih se predlaže isključenje. Članu Saveza se mora ostaviti razuman rok za izjašnjenje o pokrenutom prijedlogu za isključenje iz Saveza.

Odluku o isključenju člana donosi Upravni odbor Saveza.

Protiv odluke Upravnog odbora saveza, u roku od 30 dana, može se izjaviti prigovor Skupštini Saveza, čija je odluka konačna.

Član 16.

Član Saveza koji istupi ili koji je isključen iz Saveza dužan je izvršiti obaveze prema savezu dospjele do dana prestanka članstva.

Član 17.

Članstvo u Savezu prestaje članu koji izgubi svojstvo pravnog lica, danom upisa prestanka svojstva u registar kod nadležnog organa.

Član 18.

Skupština Saveza može donijeti opšti akt, kojim će u skladu sa ovim statutom, bliže urediti način i postupak stupanja u članstvo i prestanak članstva.

Član 19.

Članovi saveza imaju sljedeća prava i obaveze:

- da biraju i budu birani u organe Saveza
- da aktivno učestvuju u ostvarivanju ciljeva Saveza
- da budu redovno i blagovremeno obavještavani o aktivnostima Saveza
- da sarađuju sa ostalim članovima Saveza
- da čuvaju i podižu ugled Saveza
- da uredno plaćaju članarinu i izvršavaju druge preuzete obaveze
- da ostvaruju druga prava i dužnosti utvrđena Statutom i opštim aktima saveza

Posebne obaveze članova Saveza:

- omasovljuje društvo novim članovima i razvija svijest kod članova o pripadnosti – članstvu jednom društvu
- u svom članstvu trebaju imati što veći broj omladine
- omasovljuje i školuje određeni broj članova sa stručnim zvanjem u Savezu
- redovno dostavlja izvještaj Savezu o svojoj djelatnosti i poimenični spisak članstva
- u slučaju isključenja člana udruženja koji se ogriješio o planinarske norme obavezan je obavijestiti savez i ostala udruženja, članove saveza.
- poštivanje odluka Skupštine i Upravnog odbora Saveza

Član 20.

Pravo da biraju i da budu birani u organe Saveza, kao i da učestvuju u radu organa, članovi Saveza ostvaruju putem zastupnika ovlaštenih od strane nadležnih organa članova Saveza.

VI – ORGANI SAVEZA

Član 21.

Organi Saveza su:

- Skupština
- Upravni odbor
- Nadzorni odbor i
- Sud časti

Skupština Saveza

Član 22.

Skupština Saveza je najviši organ Saveza, koju čine ovlašteni zastupnici svih članova Saveza . Odluku o broju zastupnika donosi Upravni odbor na osnovu broja članova u udruženjima, članovima Saveza.

Član 23.

Skupština Saveza nadležna je za:

- donošenje Statuta, izmjena i dopuna Statuta i drugih akata određenih Statutom
- odlučuje o pridruživanju, razdvajanju, transformaciji, raspuštanju i prestanku rada kao i o drugim statusnim promjenama u Savezu
- izbor i razrješenje članova Upravnog odbora i drugih organa Saveza
- razmatra i odlučuje o izvještajima koje podnosi Upravni odbor, Nadzorni odbor, Sud časti kao i materijalno – finansijskom poslovanju Saveza
- odlučivanje o ostalim pitanjima koja nisu stavljena u nadležnost drugih organa Saveza

Član 24.

Skupština Saveza sastaje se po potrebi, a najmanje jednom u godini dana. Skupštinu saziva Predsjednik Skupštine najmanje 15 dana prije njenog zasijedanja.

Predsjednik je dužan sazvati Skupštinu u slučaju kada to zahtijeva najmanje jedna trećina članova Skupštine, ili kada to zatraži Upravni odbor ili Nadzorni odbor.

Ako Predsjednik Skupštine ne sazove Skupštinu u roku od 60 dana, u slučajevima iz prethodnog stava, odluku o sazivanju Skupštine donijet će Upravni odbor.

Član 25.

Skupština Saveza može punopravno odlučivati ako Skupštini prisustvuje više od polovine ukupnog broja članova.

Ako na zakazanu sjednicu ne pristupi više od polovine ukupnog broja članova Saveza, po isteku jednog sata od vremene određenog za početak rada Skupštine, skupština može punovažno odlučivati ako je prisutna najmanje jedna trećina od ukupnog broja članova Saveza.

Skupština Saveza odlučuje većinom glasova prisutnih članova, ako Statutom ili Zakonom nije drugačije propisano.

Član 26.

Skupština bira predsjednika Skupštine i dva podpredsjednika Skupštine, za period od četiri (4) godine uz mogućnost ponovnog izbora

Predsjednik Skupštine saziva sjednice Skupštine, predsjedava sjednicama i stara se o provođenju odluka koje donosi Skupština.

Podpredsjednici Skupštine pomažu Predsjedniku u vršenju poslova iz njegove nadležnosti.

U slučaju spriječenosti ili odsustva Predsjednika Skupštine zamjenjuje jedan od podpredsjednika koga Predsjednik ovlasti.

Član 27.

Bliže odredbe o načinu rada Skupštine, glasanja, odlučivanja, upućivanja poziva za sjednice, vođenju zapisnika i drugim pitanjima od značaja za rad Skupštine uređuju se Poslovníkom o radu Skupštine.

Upravni odbor

Član 28.

Upravni odbor čine predsjednik, podpredsjednik i 9 članova koje bira i razrješava skupština Saveza na period od četiri (4) godine sa mogućnošću ponovnog izbora, na prijedlog članica Saveza koji su se iskazali u radu. Predsjednik Upravnog odbora je Predsjednik Saveza a potpredsjednik UO je istovremeno podpredsjednik Saveza. Prilikom odabira članova Upravnog odbora potrebno je zadovoljiti teritorijalne, nacionalne, spolne principe te brojnost članstva iz kojeg dolazi, stručnost i opredijeljenost za rad u organima Saveza i drugih relevantnih kriterija.

Član 29.

Upravni odbor sastaje se po potrebi, a najmanje jedanput u dva mjeseca. Upravni odbor može odlučivati ako je prisutno više od polovine članova.

Upravni odbor donosi odluke većinom glasova prisutnih članova.

Član 30.

Upravni odbor Saveza obavlja sljedeće poslove:

- priprema sjednice Skupštine
- priprema prijedlog Statuta i drugih akata koje donosi Skupština
- provodi politiku, zaključke i druge odluke koje je donijela Skupština,
- raspolaže imovinom Saveza,
- podnosi Skupštini godišnji i periodične izvještaje o svom radu,

- formira odbore, komisije i druga radna tijela, radi izvršavanja posebnih zadataka iz djelatnosti Saveza,
- prati realizaciju finansijskog plana rada Saveza, i donosi odluke o upotrebi sredstava,
- obavlja druge poslove, predviđene Statutom i aktima Saveza

Donosi:

- pravilnik o materijalno – finansijskom poslovanju Saveza
- operativni plan rada
- pravilnike komisija Saveza
- odluku o pristupanju udruženja u Savez
- odluku o tumačenju teritorijalne, nacionalne, spolne, dobne i strune zastupljenosti u organima Saveza
- interventne mjere i aktivnosti iz djelokruga rada Saveza
- prijedloge za izgradnju planinarskih objekata, markiranje planinarskih staza i transverzala od interesa za planinarstvo u Federaciji Bosne i Hercegovine i određuje njihovu kategorizaciju / pješačka staza, osigurani put i sl. /
- odluku o dodjeli stručnih zvanja planinarskim specijalističkim kadrovima
- odluku o dodjeli priznanja, a na osnovu Pravilnika o priznanjima Saveza
- odluku o suspenziji članova organa saveza koji rade u suprotnosti sa Zakonom, ovim Statutom i kodeksom ponašanja
- odluku o imenovanju zamjene za suspendovane članove organa Saveza
- odluku o cijeni članarine i cijene drugih roba i usluga koje proističu iz aktivnosti Saveza
- odluku o formiranju društvenih prostorija zatvorenog tipa u prostorijama Saveza
- odluku o formiranju stručne službe Saveza za obavljanje organizaciono – stručnih, administrativno – tehničkih i materijalno – finansijskih poslova na profesionalnoj ili volonterskoj osnovi.
- odluku o broju izvršilaca u stručnoj službi i njihove radne zadatke, a na prijedlog generalnog sekretara Saveza

Imenuje:

- predsjednike i članove Komisija, na prijedlog predsjednika Komisija, Upravnog odbora Saveza
- stalna, privremena i posebna radna tijela za obavljanje konkretnih poslova
- naredbodavca za finansijsko poslovanje saveza i utvrđuje mu ovlaštenja
- sekretara Saveza.

U cilju unapređenja i razvoja planinarskih specijalnosti a posebno školovanja i stručne obuke planinara formira se Savjet instruktora kao savjetodavni organ Upravnog odbora Planinarskog Saveza sa trajnim sastavom, a čine ga svi instruktore svih planinarskih specijalnosti. Pravilnikom o radu Savjeta instruktora, koji donosi Upravni odbor, bliže će se odrediti djelokrug rada i aktivnosti za razvoj planinarskog sporta.

Član 31.

Radi efikasnijeg rada i odnosa između Saveza i udruženja Upravni odbor formira sljedeće komisije za:

- Akcije i pohodi
- Vodiči
- Planinarske staze
- Gorska služba spašavanja
- Alpinizam
- Ekspedicije
- Sportsko penjanje
- Orjentacija
- Turno i planinarsko skijanje
- Planinski biciklizam
- Speleologija
- Planinarski objekti
- Rad sa omladinom

- Priznanja
- Propaganda i marketing
- Međunarodne veze
- Statutarnu i normativnu djelatnost

Članovi komisija bira Upravni odbor na prijedlog udruženja, članica Saveza na period od četiri (4) godine uz mogućnost ponovnog izbora

Član 32.

Članovi Upravnog odbora mogu biti opozvani i prije isteka vremena na koje su izabrani i to:

- na sopstveni zahtjev
- ako ne dođu na sjednicu tri puta uzastopno (bez opravdavajućih razloga),
- ako svojim radnjama u vezi sa radom Upravnog odbora ruši ugled Saveza
- i u drugim slučajevima predviđenim Zakonom, ovim Statutom i aktima Saveza.

O opozivu člana Upravnog odbora odlučuje Skupština Saveza.

Član 33.

Predsjednik Upravnog odbora Saveza obavlja sljedeće poslove:

- predstavlja i zastupa Savez,
- saziva sjednice Upravnog odbora, predsjedava sjednicama i stara se o izvršenju odluka iz nadležnosti Upravnog odbora,
- obavještava javnost o radu Saveza,
- stara se o zakonitosti rada saveza
- predlaže Upravnom odboru sekretara Saveza
- potpisuje zajedno sa sekretarom finansijsku dokumentaciju i korespondenciju
- vrši i druge poslove za koje je ovlašten Statutom ili koje mu povjeri Skupština Saveza

Član 34.

Sekretar Saveza obavlja sljedeće poslove:

- provodi politiku Upravnog odbora Saveza
- izvršava odluke iz nadležnosti organa Saveza
- koordinira rad komisija, članica Saveza i drugih tijela imenovanih od Upravnog odbora Saveza
- rukovodi i odgovara za rad stručne službe Saveza

Član 35.

Poslovníkom o radu, koji donosi Upravni odbor bliže se određuje način rada i odlučivanja, sazivanje sjednica, vođenje zapisnika i druga pitanja od značaja za rad Upravnog odbora.

Nadzorni odbor

Član 36.

Nadzorni odbor čine predsjednik i 2 člana koje bira i razrješava Skupština Saveza na period od četiri (4) godine, sa mogućnošću ponovnog izbora

Član 37.

Nadzorni odbor sastaje se po potrebi, a najmanje dva puta godišnje. Nadzorni odbor može odlučivati ako je prisutno više od polovine članova.

Nadzorni odbor donosi odluke većinom glasova prisutnih članova.

Član 38.

Nadzorni odbor nadležan je za kontrolu zakonitosti finansijskog poslovanja Saveza

U vršenju svoje nadležnosti Nadzorni odbor je ovlašten da vrši kontrolu svih dokumenata koji se odnose na finansijsko poslovanje, ugovora kojima Savez preuzima finansijske obaveze, kontrolu stanja na računima Saveza, kontrolu periodičnih i godišnjih obračuna Saveza

O zakonitosti finansijskog poslovanja Saveza i o svome radu Nadzorni odbor izvještava Skupštinu Saveza najmanje jedanput godišnje.

Član 39.

Skupština Saveza može donijeti opšti akt kojim se bliže uređuju ovlaštenja i način rada Nadzornog odbora u vršenju nadležnosti utvrđene ovim Statutom.

Sud časti

Član 40.

Sud časti čine predsjednik i 2 člana koje bira i razrješava Skupština Saveza na period od četiri (4) godine, sa mogućnošću ponovnog izbora.

Član 41.

Sud časti sastaje se po potrebi.

Sud časti nadležan je za postupke u kojima se utvrđuje dali je član Saveza počinio bitnu povredu Statuta ili drugih opštih akata Saveza i za izricanje mjera u slučaju ako je takva povreda izvršena.

Sud časti donosi odluke većinom glasova prisutnih članova.

Član 42.

Ako utvrdi da je član saveza počinio bitnu povredu Statuta ili drugih opštih akata Saveza, Sud časti može izreći opomenu, javnu opomenu ili predložiti Upravnom odboru isključenje člana iz Saveza.

Član 43.

Skupština Saveza može donijeti opšti akt kojim se bliže uređuju pitanja od značaja za način rada Suda časti i ostvarivanje njegovih nadležnosti, u skladu sa ovim Statutom.

Imovina saveza i korištenje i raspolaganje sredstvima Saveza

Član 44.

Imovinu Saveza čine: pokretna i nepokretna imovina i finansijska sredstva, koje Savez stiče u skladu sa Zakonom i ovim Statutom.

Za obaveze prema trećim licima Savez odgovara cjelokupnom imovinom.

Član 45.

Savez može sticati prihode iz sljedećih izvora:

- članarine
- donacija, dobrovoljnih priloga i poklona javnih institucija, fizičkih i pravnih lica, kako u gotovini tako i u imovini i uslugama.
- državnih subvencija i ugovora sa državom, javnim institucijama, fizičkim i pravnim licima,
- prihoda od kamata, dividendi, dobiti od kapitala, zakupnina, honorara i sličnih izvora,
- prihoda stečenih kroz ostvarivanje ciljeva i aktivnosti Saveza, u skladu sa ovim Statutom.

Član 46.

O sticanju prihoda, korištenju imovine i raspolaganju sredstvima Saveza odlučuje Upravni odbor u skladu sa ovim Statutom i opštim aktima Saveza.

Član 47.

Savez je dužan uredno voditi poslovne knjige u skladu sa prihvaćenim računovodstvenim principima i sastavljati finansijske izvještaje, saglasno važećim propisima.

Član 48.

Upravni odbor je dužan, najmanje jednom godišnje, podnijeti skupštini Saveza izvještaj sa podacima o imovini Saveza, korištenju imovine, prihodima i rashodima Saveza i drugim pitanjima od značaja za raspolaganje imovinom i za finansijsko poslovanje saveza.

Član 49.

Kontrolu finansijskog poslovanja Saveza vrši nadzorni odbor, na način utvrđen ovim Statutom.

Član 50.

Lica ovlaštena da potpisuju akte koji se odnose na sticanje i raspolaganje imovinom Saveza i na finansijsko poslovanje su: predsjednik Upravnog odbora i generalni sekretar Saveza

Upravni odbor svojom odlukom može ovlastiti i druga lica da potpisuju akte iz prethodnog stava.

Član 51.

Svaki član Saveza ima pravo da ostvari uvid u poslovne knjige i drugu dokumentaciju u vezi sa imovinom i finansijskim poslovanjem Saveza.

Član 52.

Skupština Saveza može donijeti opšte akte kojima se, u skladu sa ovim Statutom, bliže uređuju pravila zaostvarivanje, korištenje i raspolaganje sredstvima Saveza i za nadzor nad korištenjem tih sredstava.

Javnost rada

Član 53.

Rad Saveza je javan.

Javnost rada Saveza ostvaruje se na način utvrđen zakonom i ovim Statutom.

Član 54.

Organi Saveza su dužni da ovlaštenim predstavnicima sredstava informisanja učine dostupnim podatke, informacije i isprave koje se odnose na rad Saveza.

Predstavnici sredstava informisanja imaju pravo da prisustvuju sjednicama organa Saveza i da izvještavaju o radu tih organa.

Član 55.

Članovi Saveza imaju pravo da budu redovno informisani o radu svih organa saveza. O informisanju članova Saveza staraju se predsjednik Upravnog odbora i generalni sekretar Saveza.

Član 56.

Izuzetno, opštim aktom koji donosi Upravni odbor može se utvrditi da pojedine informacije, podaci i isprave, predstavljaju poslovnu tajnu. Istim aktom mogu se utvrditi odgovorna lica za korištenje i zaštitu informacija koje imaju karakter poslovne tajne.

Za poslovnu tajnu ne mogu se odrediti podaci koji su javni po zakonu i drugim propisima, kao i podaci o kršenju zakona i drugih propisa.

Statut i drugi opšti akti Saveza

Izmjene i dopune Statuta

Član 57.

Inicijativu za izmjene i dopune Statuta može podnijeti svaki član Saveza. Inicijativa se podnosi Upravnom odboru, pismenim putem i sa odgovarajućim obrazloženjem.

Član 58.

Prijedlog za izmjene i dopune Statuta utvrđuje Upravni odbor. Utvrđeni prijedlog dostavlja se Skupštini Saveza, pismenim putem i sa odgovarajućim obrazloženjem, najmanje 30 dana prije dana održavanja sjednice Skupštine.

Član 59.

O izmjenama i dopunama Statuta odlučuje Skupština Saveza

Član 60.

Predsjednik skupštine potpisuje 6 primjeraka odluke o izmjenama i dopunama Statuta, koji se smatraju originalima i čuvaju se u arhivi Saveza.

Opšti akti Saveza

Član 61.

Pored Statuta, organi Saveza mogu donositi i druge opšte akte i to:

- odluke
- pravilnike i
- poslovnike

Opšti akti saveza moraju biti saglasni zakonu i Statutu Saveza.

Član 62.

Odluke, kao opšti akti, donose se u slučajevima kada je to izričito utvrđeno Zakonom i ovim Statutom, kao i u drugim slučajevima kada se na opšti način uređuju pitanja od značaja za ostvarivanje ciljeva Saveza.

Član 63.

Pravilnikom se na opšti način uređuju odnosi između članova Saveza, kao i međusobni organa Saveza u ostvarivanju njihovih nadležnosti.

Član 64.

Poslovníkom se bliže uređuje način rada organa Saveza u izvršavanju njihovih nadležnosti utvrđenih Statutom.

Član 65.

Originalni primjerci opštih akata Saveza čuvaju se u arhivi Saveza.

Pečat Saveza

Član 66.

Pečat Saveza je okruglog oblika, promjera veličine 30 milimetara, sa znakom runolista u sredini i tekstom ispisanim latiničnim i ćirilicnim pismom te nazivom na Engleskom jeziku koji glasi “Planinarski savez Federacije Bosne i Hercegovine” sa sjedištem u Sarajevu.

Član 67.

Ukoliko Savez ima više pečata ,svaki pečat se označava odgovarajućim brojem.

Upravni odbor će donijeti Pravilnik kojim se bliže uređuje način upotrebe i čuvanja pečata Saveza.

Zastupanje Saveza

Član 68.

Savez zastupa predsjednik Upravnog odbora Saveza.

Član 69.

Upravni odbor može donijeti odluku kojom će ovlastiti i druga lica da zastupaju Savez.

Odlukom iz prethodnog stava Upravni odbor će utvrditi i ovlaštenja,odnosno ograničenja ovlaštenog lica u zastupanju Saveza.

Član 70.

U postupcima kojima Savez učestvuje kao stranka radi ostvarivanja svojih prava,dužnosti i odgovornosti pred nadležnim organima,predsjednik Upravnog odbora može dati pismenu punomoć za zastupanje advokatu ili drugom stručnom licu.

Statusne promjene

Pridruživanje,razdvajanje i Transformacija Saveza

Član 71.

Savez se može spojiti razdvojiti ili transformisati samo u drugo udruženje ili fondaciju,a posebno u strukovne,tipa; Alpinizam,vodiči,speleologija i slično

Član 72.

Odluku o pridruživanju,razdvajanju ili transformaciji donosi Skupština Saveza na prijedlog Upravnog odbora.

Odlukom iz prethodnog stava se reguliše naročito:

- naziv Saveza koji nastaju razdvajanjem,odnosno naziv saveza kome se Savez pripaja ili naziv Saveza nakon transformacije u Savez od javnog interesa,kao i sjedište i adresu,
- podjela imovine,prava i obaveza,
- ciljevi Saveza nakon razdvajanja,pridruživanja ili transformacije,
- imena osoba ovlaštenih za obavljanje poslova u podnošenju zahtjeva za upis u registar izvršene transformacije Saveza.

Član 73.

Odluka iz člana 72.Statuta smatra se usvojenom kada je na sjednici Skupštine prihvati dvotrećinska većina od ukupnog broja članova Saveza.

Prestanak rada Saveza

Član 74.

Savez može prestati sa radom dobrovoljno ili po sili Zakona.

Član 75.

Savez prestaje sa radom dobrovoljno,ako Skupština dvotrećinskom većinom svih članova Saveza donese odluku o raspuštanju Saveza.

Član 76.

Istovremenom sa odlukom o raspuštanju Saveza,Skupština donosi plan likvidacije Saveza,kojim se utvrđuje raspored imovine,prava i obaveze saveza,u skladu sa Statutom Saveza.

Skupština imenuje likvidatora Saveza čija dužnost je da se stara o izvršenju plana likvidacije i koji je ovlašten da zastupa Savez u postupku likvidacije i u podnošenju zahtjeva za prijavu prestanka rada Saveza nadležnim organima.

Član 77.

U postupku likvidacije Saveza iz imovine Saveza izmirit će se sve dospjele zakonske obaveze,kao i obaveze nastale prema drugim povjeriocima Saveza,a eventualna preostala imovina rasporedit će se na članove Saveza srazmjerno njihovom doprinosu u plaćanju članarine.

Prelazne i završne odredbe

Član 78.

Statut stupa na snagu danom usvajanja na Skupštini a objaviće se na oglasnoj ploči Saveza i zvaničnoj web stranici.

Broj: 117 – 06/16
Sarajevo 14.06.2016. godine

Predsjednik Skupštine PS FBiH

Dragan Markelić